

## Коммунал хизматлар сифати – аҳоли фаровонлиги ва розилигининг муҳим омили



Ўзбекистон Республикаси Президенти Шавкат Мирзиёев 2 октябрь куни аҳолига сифатли коммунал хизмат қўрсатиш, кўп қаватли уй-жойлар, иқтисодиёт тармоқлари ва ижтимоий соҳа объектларини куз-киш мавсумига тайёрлаш ишларининг ҳолати таҳлилига бағишиланган йиғилиш [ўтказли](#).

Унда Ўзбекистон Республикаси Бош вазири ўринbosарлари, тегишли вазирлик ва идоралар раҳбарлари иштирок этди.

Йиғилишда аҳолига уй-жой коммунал хизматлари қўрсатишни тубдан яхшилаш, уй-жой фонди ва ижтимоий объектлардан фойдаланиш тизимини янада такомиллаштириш, хусусий уй-жой мулкдорлари ширкатларининг иш сифатини юксалтириш ва молиявий-иқтисодий барқарорлигини таъминлаш борасида амалга оширилаётган ишларнинг бориши кўриб чиқилди.

Президентимиз одамларнинг кундалик ҳаёти, фаровонлиги, саломатлиги ва кайфиятига бевосита даҳлдор бу масалаларга доимий эътибор қаратиб келмоқда. Шу мақсадда давлатимиз раҳбарининг 2017 йил 18 апрелдаги "Уй-жой коммунал хизмат қўрсатиш тизимини бошқаришни янада такомиллаштириш чора-тадбирлари тӯғрисида"ги фармонига мувофиқ Ўзбекистон Республикаси Уй-жой коммунал хизмат қўрсатиш вазирлиги тузилди. Ўтган даврда вазирлик томонидан кўп хонадонли уй-жой фондини сақлаш ва таъмирлаш, хусусий уй-жой мулкдорлари ширкатлари фаолиятини мувофиқлаштириш, муҳандислик-коммуникация тармоқларини эксплуатация қилиш борасида муайян ишлар амалга оширилди.

Давлатимиз раҳбарининг топшириғига мувофиқ мутасадди вазирлик ва идоралар вакилларидан иборат иккита маҳсус ишчи гурух тузилди. 1-ишчи гурух томонидан Андижон, Фарғона, Наманган, Жizzах, Сирдарё, Тошкент вилоятлари ва Тошкент шаҳрида, 2-ишчи гурух томонидан Корақалпоғистон Республикаси, Хоразм, Бухоро, Навоий, Самарқанд, Сурхондарё, Қашқадарё вилоятларидағи ҳолат ўрганилди. 18 июлдан 30 сентябргача давом этган ўрганишларда соҳадаги муаммоларни бартараф этиш бўйича белгиланган чора-тадбирларнинг ҳар бир шаҳар ва туманда бажарилиши таҳлил қилинди. Асосий эътибор кўп қаватли уй-жой фонди, ижтимоий соҳа объектлари, ичимлик суви, электр энергияси, иссиқлик, табиий ва суюлтирилган газ таъминоти, кўмир етказиб бериш, санитар тозалаш каби масалаларга қаратилди. Жойларда аҳоли, маҳалла фаоллари, таълим ва соғлиқни сақлаш муассасалари вакиллари билан учрашувлар ўтказилиб, уларнинг талаб ва таклифлари инобатга олинди.

Йиғилишда ишчи гурухлар раҳбарларининг ҳисоботи эшитилди.

Ўзбекистон Республикаси Президентининг 2017 йил 22 июндаги "Республика иқтисодиёти тармоқлари ва ижтимоий соҳаларини 2017/2018 йиллар куз-қиши даврида барқарор ишлашга комплекс тайёрлашни таъминлаш чора-тадбирлари тўғрисида"ги қарорининг ижроси бўйича Қорақалпоғистон Республикаси, Тошкент шаҳри ва вилоятларда тизимли ишлар амалга оширилган. Марказий қозонхоналар, иситиш қозонлари, иссиқлик, сув, газ, электр тармоқлари таъмирланган.

Кўп қаватли уй-жой фондини куз-қиши мавсумига тайёрлаш мақсадида ишлаб чиқилган дастур асосида уйларнинг том қисмлари таъмирланган, йўлаклар ва ертўлалар тартибга келтирилган. Болалар майдончалари қурилган. Майший чиқиндилар маҳсус жойларга ташиб кетилган.

Таълим муассасалари, болалар уйлари, шифохоналар ва бошқа ижтимоий обьектларда таъмилаш ишлари амалга оширилган.

Олис ва табиий газ етиб бормаган аҳоли пунктларига зарур миқдорда майший газ баллонлари етказиб берилган.

Йиғилишда аҳоли ва ижтимоий соҳа муассасаларини электр ва иссиқлик энергияси, ичимлик суви, табиий ва суюлтирилган газ, қўмир, ёқилғи-мойлаш маҳсулотлари билан таъминлаш, кўп қаватли уй-жой фондини сақлаш, оқова хизматлари кўрсатиши борасидаги ишлар танқидий таҳлил қилинди. Бу жабҳалардаги ишларни изчил давом эттириш, барча уй-жойлар, мактаб, шифохона ва бошқа ижтимоий обьектларнинг куз-қиши мавсумида иссиқ бўлишини таъминлаш юзасидан муҳим вазифалар белгиланиб, ишчи гурухларга зарур кўрсатмалар берилди.

Президентимиз куз-қиши мавсумига тайёргарлик дастурлари ижросини танқидий қайта кўриб чиқиш, режалаштирилган чора-тадбирларни манзилли ва мақсадли амалга ошириш, маблағлардан самарали фойдаланиш, энергия тежамкор технологияларни қўллашни кенгайтириш зарурлигини таъкидлади. Бу борадаги ишларни вилоятлар ва соҳалар кесимида эмас, маҳаллама-маҳалла, уйма-уй амалга ошириш кераклиги қайд этилди.

Йиғилишда Ўзбекистон Республикаси Президенти Шавкат Мирзиёев мутасадди вазирлик ва идоралар раҳбарларига уй-жойлар ва ижтимоий-иктисодий обьектларни куз-қиши мавсумига тайёрлаш ишларини якунлаш, аҳолини электр, иссиқлик, газ, сув ва бошқа ҳаётий зарур воситалар билан узлуксиз таъминлаш, одамларнинг фаровонлиги ва розилигини ошириш бўйича кўрсатма ва топшириқлар берди.

[ЎзА](#)